

Pól e lél yony em ek'awñ Korént eyñ

Ów ek'it eke wél k'uw any

Erm es Pól ij akpo nyahan Efes eb em, in e sakp nyahan em ec'usu im ab em, ec a eke li b'ec susu susu n'am ÷b Amani Mamm eci kokoba a. Yogn anake ni non krekre em Korént e lél a n'awñ Nyamel ek'anñ Korént a. Eke ow ibn tel a, wuwal owi ey Efes eb ab em, toñ Pól tel ce ke írmn in e sel a (Ob Kok 19; 2 Korént 1.8-10).

Ow e jam a, Timote anñ Korént ow lele amani eññ ab eke em bubr owi a in anñ ce etñ nyimn esel beb in am cacak ow. Ow ÷ñ Pól in obi im yogn etñ ÷m el ów eke -li k'itñ es an. In ec'im na eke n'im n'am ekn wél ab em anake Nyamel ab em ec'idr es nyam kok'r és, ÷wr'r sos es a (2.5-11; 7.12). Low na nuñ af, Pól ewl kpri im Efes etñ ni non lél ejeci nyam sos es ÷w non ab (2.4; 7.8); Tit anake oc lél a im a, kó lél ikñ a, yefenyina em a, s'uwm usu nuñ nyam ek'ow ey ab any. Ow e jam a, Pól ñgboñ Efes etñ us ejagb aam Korént, gbekó l'ecr Maseduan eci eke li k'ekn Sinyamel ek'anñ Filip eb em lele Tesaloni eb em ab a. Yogn, l'obr Tit (7.5-6) ek'ism amani amamn ab eke lél es abal el a in ÷su ey amamn Korént yogn (7.7).

Eben yeji, Pól uw any eke aññ anñ Korént yogn eke am cacak'r. Etñ ni non lél na eke s'esñ Pól e lél yony em eke awñ Korént eyñ a. Lél na anake el silél a eke ni non n'awñ Korént e Nyamel a ec'es abal el a.

Nuñ 1 toñ nuñ 7 a, am otar low sosiem eke n'ony wél ec'im ekn e low a eke li bebñ l'ew es a l'itñ lele low nuñ af eke ni non lél lebl kpañkpañ n'awñ wél a. Gbekó, sos em ññ'n eke lél ikñ a ÷su ey amamn a.

Pól am tutr eke k'im anñ el ab ibn etñ n'am atr wél sos es eke -li ki yibr ob ap a eke wél am kok Jerusalem ec'wgburu a sosiem ec'a, ke -l'elu el ec'erm mamn a ÷km (Nuñ 8 toñ nuñ 9).

Nuñ 10 toñ nuñ 13 em a, Pól agbr lebl es lél ab em etñ n'am dogññ in ec'erm es e l'el ec'abusu eke n'ony a e low. Etñ li dad eke in e jam ec'ow eke in b'ow in ow wél ec'araññ a, in b'ow in elu in ec'abusu ony a ÷km eke ow'n it ek'in ki kok eben. Eke n'awñ lél a, ow ibnm etñ l'ow l'ey Korént etñ n'anñ lefr legñ iy a nimum ese elél eke li bebñ l'ew es ab af (1 Korént 16.5-6). In eci Korént eke n'im n'am ekn a anake ni non Rom eyñ eci lél a.

Esiɔn

1 ¹Em Pɔl, m'el Jesu Krist ec'erm es anke Nyam erur. Ey lisijim Timote ab e nin em, m'am awɔɔ Nyamel ek'anɔ Korɛnt a lele Nyam ec'agɔ a fɛɔ ek'anɔ Akayi nimum ab a lel na.[†]

²Ke Nyam ey Es lele Es Kɔtɔkɔ Jesu Krist ab ɛɔɔɔ ony ɔwɔ ke ɔɔ ony erm es ey!

Pɔl am ɔɔ Nyam bia

³Si kɔklm Nyam ek'el ey Es Kɔtɔkɔ Jesu Krist ec'Es a! L'el ɛɔɔ Es ek'ij gbɛɔɔɔɔɔ ɔɔɔɔ ikɔ em ɛɔɔ l'el Nyam eke b'atr ey sos es low low fɛɔ em.

⁴Li b'atr ey sos es ey e ses babur fɛɔ em, yec'ɛɔɔ ke ey yeji s'atr agɔ ek'am ij gbɛ a sos es. ɛɔɔ ɛben a, si b'ɔɔ ɛl yec'a eke ey obi yeji si b'eb Nyam ogɔ a. ⁵Tasi em a, elee a eke si b'ij gbɛɔɔɔ Krist e nin a ec'a, ɛben nɛnyembri nyam si b'ɛɔɔ sos es atr ɔɔɔɔ in em. ⁶Eke s'anɔ es abur em, ke ɔɔ e sos es atr lele ɔɔ e ɔɔ ab eci. Eke s'am ɛɔɔ sos es atr, ke ɔɔ e sos eke si k'atr ɔɔ es ɛɔɔɔ gbɛɔɔ nɛnyembri nyam a eke s'am ij ɛɛ ɔɔ af a ebr eci. ⁷S'ɔɔ ɔɔɔ tasi ey em eke si bi tutɔ ɔɔ e l'is owi a, anke s'uw low nyam any: ek'am ijr gbɛɔ ey ab a, ɔɔ yeji sos es atr eke s'ɛɔɔ a el ɔɔ eci.

⁸Agɔ lisijimel, ow it e k'uwɔ any eke Azi wus af a,[†] s'ɛɔɔ gbɛɔɔ ijr ɛgbel ɔɔɔ s'eb, gbɛɔɔ ijr ek'el e leg a agb afɔɔ ey e lɛc ab es, toɔ ke s'irmn owɔ anɔ ec'ɔɔɔ fɛɔ. ⁹ɛɔɔ ey obi yeji s'uw any tasi eke si b'ow s'uw. ɛben a, si k'ɔtum s'ocm ey ec'ɔɔɔ s'elum ey obi em ij, kɔ Nyam eke b'igbm agɔ luw em a ɔɔɔ coco em si k'oc s'elu. ¹⁰Nyam anake ɔɔ oc ey es luw na em a ɛɔɔ ɛmɛny li b'ow n'ɔny l'oc ey es. ɛɛ, s'ɔɔɔ ɔɔɔ in em eke ɛmɛny li b'ow n'ɔny l'oc ey es. ¹¹ɔɔ yeji, eke bi ɔɔɔɔ Nyam ɔɔɔ ey, ke abu ɛlumɔ ey a. ɛɔɔ si b'ow s'ɛɔɔ bibm Nyam em, agɔ ɔɔɔ eci ɔɔɔ a sɔsiem. ɛɔɔ na sɔsiem agɔ ɔɔɔ b'ow ɔtu ɔɔ Nyam bia ey eci.

Pɔl itɔɔ in ec'usu im ec'ow a eke li bebɔ a

¹²Eke low nyam anɔ eke k'ɔɔ ntotɔ ok ey, ke ey ec'ow tutɔ a ec'ow eke okm ey af a. N'am dad ey tasi eke si kok low ɛlum em lele nɛnyembri nyam em ab agɔ fɛɔ ab, ab brobro ɔɔ e l'is. Na low ek'anɔ Nyam ogɔ ow, Nyam eci erm mamɔ a anake nyimɔ ey a, kɔ ow elm agɔ e sɛwɔ a gbɛ. ¹³⁻¹⁴Tasi em a, awal yec'a eke si ɔɔ ey e silɛ ab em a, irir ɛɔɔ si lɔlam ɔɔ low kaka es em yogɔ. Low nyam gbɛ anɔ eke irimɔ okm ɔɔ es sos em, kɔ m'am ɔɔ ɔɔ eke ow b'ow ok ɔɔ es sos em tasi: lɛɔɔ a eke Es Kɔtɔkɔ Jesu b'ow ow a,[†] ntotɔ b'ow ok ɔɔ ey eci, ɛɛ elee eke ey yeji ow b'ow ok ey ɔɔ ec'ab af.

[†] 1.1 Akayi anɔ Gres esr em a. Pɔl eci yogɔ eke ɔɔ es im ec'a, ɛkn Ob Kok 18.1-18.

[†] 1.8 Azi wus af a: ɛkn 1 Korɛnt 16.19 lel ow ec'akɔ otar ab ab. [†] 1.13-14 lɛɔɔ a eke Es Kɔtɔkɔ Jesu b'ow ow a: ɛkn 1 Tesaloni 2.19-20.

15-16 Eke m'uw ɔny eci ntotɔ ab any tasi a, mi bɛbm eke mi k'ikɔ anym m'ɛc ɔny ogɔ a, ke m'anɔ yogɔ m'im Maseduan, ba em e mɛny ɛwl ow em a, ke mi gbár es ɔny ogɔ yogɔ. Eɛn a, ow b'ow ɔɔ ɔny abusu kokr sos em iɔn sakp yony ɛtɔ b'ow ɛlumn'm abu m'im Jude.† 17 Eke mi bɛbm low na a, kɔ mi tutrm ów ee? Oglog eke mi bi bɛbm ów a, kɔ em obi ec'erur a eke mi ki kok a sɔsiem mi b'ɛɔ "ɛɛ", ke emɛny m'ítɔn m'ɛsɛ "nɔɔ" ee? 18 M'am eb Nyam danɔku, odad eke s'am dad ɔny a, elm "ɛɛ" lele "nɔɔ" ab. 19 Silas, Timote lele em ab, s'ɔb ɔny Nyam Jim Jesu Krist ec'amani a. Ow akpl ke úwr any eke Jesu elm "ɛɛ" lele "nɔɔ" ab, kɔ sɛɔɔ fɛɔ "ɛɛ" cɛ li b'el. 20 Tasi em a, Jesu el ów a fɛɔ eke Nyam ɛwar ɛy ɛw es a eci "ɛɛ". ɛtɔ Jesu em anake si bi dad ɛy eci "amen" a, ke si bi kɔklm Nyam ec'anygbel a. 21 Nyam in obi anake b'ɔɔ ke ɔny lele ɛy ab, si b'ɔny lɛc Krist em a. In anake li sɔsum l'ot ɛy, 22 ke l'ɛw ɛy in e mɛny ɛwr a ek'am yɛgm eke s'el in ec'a af a. L'oc Abɔ Lala l'ɛlu ɛy ɛrm em, eke k'el aja a eke li b'ow n'ɔɔ ɛy a eci asmanu.

23 Bla sɔsiem ɛtɔ mi k'ɛwlm mi k'owm Korent ee? M'am eb Nyam danɔku, l'uw'm any ɛtɔ l'uw any eke m'ɔnym yadɔ. Mi k'owm, aɔke m'erurm eke mi k'ijr ɔny gbɛ. 24 S'ɔlm eke si k'ɔɔ ɔny low lɛc em ubr nawrɛ. Tasi em a, ijr lɛc ɔmn em, gbɛkɔ s'am erur eke si k'okr af si kok juma ɔny e sos em iɔn a eci.

2 1 Kin low yec'ɛke mi bɛbm a: m'erurm eke mi k'ɛwl m'ow ɔny ogɔ yogɔ, eke emɛny ow b'ow ɔwr ɔny sos es.† 2 Eke em m'owr ɔny sos es, ke bwo ec'ɛɔ b'ow ɔɔ'm sos em iɔn, eke ow elm ɔny a cɛ eke m'owr ɔny sos es ab ee? 3 M'erurm eke mi k'ow m'ɛkn ɔny, ke m'owr ɔny sos es. Ow akplm ek'agɔ a ek'it eke k'ɔɔ'm sos em iɔn a, k'el agɔ a eke b'owr'm sos es a. Na ec'anake m'awɔ ɔny lel es abal el a.† M'uw any tasi eke low yec'ɛke b'ɔɔ'm sos em iɔn a, ɔny yɛɔi b'ɔɔ ɔny sos em iɔn. 4 ɛɛ, mikɔ ab mi nɔn lel a m'awɔ ɔny, sos es ɔw lel ɛrm mij ab iy'm ɛrm em gbɔɔ. Gbɛkɔ m'awɔm ɔny lel a eke mi k'owr ɔny sos es, m'awɔ ɔny yec'ɛtɔ ke ɛkan erur ligbel a eke m'ɔny ɔny ec'a.

Pɔl am oc low ap ɛɔɔ a eke wɛwr'r a

5 Nawrɛ, ɛɔɔ na eke is sos es ɔw owi na a, ow elm ów a m'erurm eke mi k'agbr gbɛ, kɔ m'am dad m'ɛsɛ li kok Nyamel low ɔɔɔ l'akm em obi a. ɛtɔ ek'ow elm ɔny fɛɔ yɛɔi, ɔny em ec'agɔ bɛb gbɛ low a ɔn es. 6 ɛɔɔ ikɔ a ec'a, abr a cɛ eke ɔny em ec'agɔ enym'n a ɔɔɔ cɛ ɔɔ. 7 Ow sɔsiem, caca

† 1.16 Pɔl ɔny tutr eke k'im Korent (ɛkn 1 Korent 16.5-9); aɔa n'am otar low a nuɔ af eke li k'ɛwlm li k'owm li k'ɛknm wel a akr (ɛkn akr 23-24 em a). † 2.1 eke emɛny ow b'ow ɔwr ɔny sos es: low any uw ɛsɛl beb tutr eke Pɔl im Korent kok sɛɔɔ abi ka eke ni nɔn 1 Korent uwr a (ɛkn 2 Korent 13.1). Gbɛkɔ wel ebm Pɔl sɛnyɔ sɛnyɔ ɛtɔ Nyamel ec'ɛɔɔ nyam kok'r ɛs eke Nyamel dadm low kaka (ɛkn akr 5 tɔɔ akr 11 em a). † 2.3 Pɔl am dad lel nyam eke n'awɔ wel a e low. Lel a, s'uwm yogɔ nuɔ nyam eke l'ɛy ab any.

em a, ow akpl eke k'ocr apr ir ke atar ir sos es; ek'ow elm eben, sos es ow ligbel otu eke k'owr'r sos es nimum nimum. ⁸Sica m'am ibrm eke k'elul erur okm in e lís. ⁹Tasi em a, kin low a nun af eke m'awj ony lel a: m'erur eke mi k'ekn eke b'ow onyn elumn low low fej em. ¹⁰Eke b'apr egn low, em yeji mi b'ap'r. Eke low anj eke mi k'ap yeji, mi b'oc m'ap ony sosome, Krist ec'any af. ¹¹Etj nene a, **Satan** otum ejum ey. Ee, s'uw in e sow tutr ab any tasi.

Pól im Troas eb em

¹²Eke m'im m'ey Troas eb em, Krist ec'Amani Mamm a ec'ob ec'a, Es Kótókó onj'm m'ejn juma na e kok ec'abusu mamm. ¹³Gbekó m'onny ermij nonó, anje m'otum m'ejnm ey lisijim Tit. Na sosome m'ibrm Troas ec'agn a abusu etj m'eb ejagb m'im Maseduan wus af.

Jesu Krist b'eb any onj ey

¹⁴S'ónj Nyam bia! Segj fej, li b'ecr Krist em l'ot l'ok ey in ec'agn a ek'eb any ke am ij facue ab em, etj li b'ecr ey em n'ónj wel uw Krist any usu a fej. Ow anj ese s'ónj mamm eke b'eb es usu a fej af. ¹⁵Ee, ey s'ann ese mijey njónj eke Krist am onj Nyam af. Etj ow eci s'ónj a ok sakp yony: agj a ek'ann sel ejn ec'ejagb ab af a lele el a ek'am irmn el e sel ab ab eci. ¹⁶Agj a ek'am irm ec'a, ow el luw e s'ónj eke b'ism luw ab. Kó agj likpr a ec'a, ow el owr anj e s'ónj eke b'ism owr anj ab. Etj kó bwo ec'ejj ony abusu eke ki kok juma nene ee? ¹⁷Ey s'ann ese agj nonó gbél eke b'oc Nyam odad am wól an, os eke -li k'ejn sosome ec'ab af. Ey, Nyam am ekn eke s'am dad odad eke b'ann in ogj ow a neny nyam em, etj s'am dad lele Krist ec'abusu ab ab.

Sinn owr a e juma kok esel

3 ¹Nene eke s'am dad a, kó ey obi ey obi s'am aw abusu s'eb ab ee? Agj beb ec'a ow it eke -li ki yegm ony el ec'abusu ony e silel oglog -l'ibrm ony e lís. Kó ey yeji eben si ki kok ab ee? ²Ey e lel a, ow ow el ony. Ey e merm ab em wel non, agj a fej uw any etj b'awl. ³Ee, ow ayl, Krist in obi non lel na, etj ey anake s'oc s'ow a. N'ann ese lel eke wel oc lel mij non ab af, kó Nyam ek'ann owr ec'Abj a l'oc ni non. Ow elm lebn af ni nonm, [†] kó agj e merm ab em ni non.

[†] 2.14 *Ow anj ese s'ónj mamm eke b'eb es usu a fej af:* eke wel b'ogj ar uwr a, ar ogj esel a eke eb any a b'ónj es, el e madu a eke -n'onyn ar em a anj el jam, ke -n'am ok banj. Eb eyj a sos em inj em, bi krakpab suw amamn am wowl eberj em a ke am ofj sekp njónj. S'ónj mamm a eke b'ónj ok okm a akpl agj a ek'eb any a eci; kó madu a ec'a, ow b'el luw e s'ónj. [†] 3.3 *Aja, Moís ec'ol a e low Pól am tutr. Èkn Okm Ok 24.12. Kokoba ob es Jeremi dad eke Nyam in b'ow in non ol owr a agj e merm ab em. Èkn Jeremi 31.33; Ezekiel 11.19; 36.26-27.*

⁴Nyam ec'any af a, s'ony ɔmn low na em, anke Krist ɔɔ ey ɔmn ɔny ligbel. ⁵Si kí tutrm eke si k'ony abusu si kok low ey ɔny coco, kɔ Nyam anake ɔɔ ey s'ony abusu si kok low a eke s'am kok a. ⁶In anake n'ony ey s'ony abusu s'am kok **sinm** owr na e juma a. Sinm na anm ol eke wel nɔn a e low em, kɔ Abɔ Lala e low em n'anɔ. Ol eke wel nɔn a b'ism luw ab, kɔ Abɔ Lala, in, b'ism sel ab.

⁷Ol a eci sodad a lebn af wel nɔn, etɔ luw ce l'ism ab. Gbekɔ eben yeji, Nyam ec'anygbel a jejn Mois ec'any ab af. In ec'any a am jejn afɔn es ton Israel ec'ey a ɔtum eke ki ler'r, eke jejn a ɔb nuɔ am is es a bɔbɔ yeji.[†] ⁸Gbekɔ Abɔ Lala e juma a eke am kok a b'ow eɔn anygbel agb akm na. ⁹Eke ol eke b'ism agɔ luw ab a e juma a eɔn anygbel ligbel, ow ayl tasi eke Abɔ Lala eke b'ony agɔ el nyim nyim a eci juma a, b'ow eɔn anygbel eke b'ow agb nɔn ligbel. ¹⁰Ow ɔɔ a, anygbel a eke legɔ sig em a jejn a, elm low kaka ij anygbel liplemu na ec'any af. ¹¹Eke ów a eke íbnm a anygbel iy em gbɔɔ, eben ke el a eke bíbn a, b'ow eɔn anygbel ek'agb nɔn ligbel.

¹²Low ɔmn na ab, s'ony ɔmn iy ey em gbɔɔ. ¹³Ey si kókm ese Mois eke oc gbad bubur any es, yec'etɔ ke Israel ec'ey a k'onym abusu eknm anygbel a e jejn a eke ibnm, ke am uwr a. ¹⁴Gbekɔ el e nuɔ em ɔny a ɔtum irim low kaka. Etɔ ton yefenyina em, eke -li b'awl sinm sig e silel a,[†] gbad nyam a ce emeny bi bubur ów a es, anke gbad a, Krist ab ec'af okr a ce b'ony oc'r es. ¹⁵Tasi em a, ton yefenyina em, sakp sakp feɔ eke Israel eyɔ b'awl Mois e silel a, gbad nyam bi bubur el e nuɔ em ɔny ab es. ¹⁶Gbekɔ sakp sakp feɔ eke eɔn nyam b'ewl ow Es Kɔtɔkɔ ogɔ a, gbad a b'oc es.[†] ¹⁷Odad na eke el “Es Kɔtɔkɔ” a, ke Abɔ Lala ana. Etɔ eke Es Kɔtɔkɔ ec'Abɔ a anɔ usu nyam, in anake li b'ony ey s'nygbɔɔ ey e madu el ab em a. ¹⁸Ey feɔ ec'any a gbe gbad anm buburm es, etɔ Es Kɔtɔkɔ ec'anygbel a am ɔn'li jejn ese akɔɔnɔ em es am ler af. Etɔ Es Kɔtɔkɔ ek'el Abɔ a b'itɔn ey. Li b'ony s'anɔ ese in af, anygbel ligbel nyam eke seɔn feɔ anɔ ese in ec'ab af ab em.

Jesu ab s'am ijr gbre

4 ¹Nyam, in ec'erm mamn ab em, abul ey juma na; ow sosiem anake sos ɔwm ey es a. ²Ey si wal yadɔ owi feɔ eke wel b'oc kokr és owi es lol em a s'elu es. S'am kok low nenyembri nyam em etɔ s'onym Nyam ec'odad ebl a s'itɔnm. Kɔ nana, si b'elu low nawre ɔkm kpata, etɔ eben a, ow b'ony agɔ feɔ el e tutr ab em, b'uw agɔ yec'eke s'el ab any. ³Gbekɔ eben yeji, ey ec'Amani Mamn a b'el ob eke lol es agɔ beb a eke am irmn el e sel a eci. ⁴-N'onymn ɔmn anke **Satan**, wus na e nyàm nyɔ a efal el e nuɔ

[†] 3.7 Èkn Òkm Ok 34.29. [†] 3.14 *sinm sig e silel a*: el -l'el Amani Sig e silel a. [†] 3.16 Èkn Òkm Ok 34.34.

em ɔny a any, etŋ ow ɔŋ -l'ɛknmn Amani Mamn ab em ec'usuayl a eke am jejn ow a. Amani Mamn a am dad Krist ek'in obi a el Nyam ec'es otarir kpeŋ ec'anygbel a ec'odad. ⁵Tasi em a, amani a eke s'am ɔb a, ow elm ey obi, kɔ ɛs Kɔtɔkɔ Jesu Krist s'am ɔb. Etŋ ey, s'el ɔny e juma kok ɛsel Jesu Krist sosiem. ⁶Nyam dad nine: *ke usuayl áfŋ ncebn ec'araŋn!*[†] Etŋ ow el in obi eke l'afŋ ey e merm ab em ey ec'es ekan eci, ke n'ɔŋ ey s'ɛkn in ec'anygbel a ek'am jejn Krist ec'any a.

⁷Gbeɔɔ ey eke s'am abu ob ɔny na a, s'anŋ ɛse kpeŋ em mɛw af. Ow b'ɔŋ wel b'uw any sɛnyn sɛnyn eke abusu gbɛl na ow elm ey em ow ánm eym ɔkm, kɔ Nyam ogŋ a ow b'anŋ ow. ⁸Ses babur b'eb ey susu feŋ, gbɛkɔ -li kiknmn ey es. Etŋ eke si b'anŋ sel at em a bɔbɔ yeji, s'ígŋm low a s'elum es. ⁹Wel b'ijr ey gbɛɛ ey ec'ɔmn a sosiem, gbɛkɔ Nyam ígŋm elum ey es. Wel b'ɔny ok ey wus, kɔ s'úwm gbɛ. ¹⁰Gbre ij na em, si b'uw Jesu e luw a ek'anŋ ey sos megl em ab any, yec'etŋ ke s'ótu s'uw in ec'owr anŋ a ek'anŋ ey sos megl em a yeji any. ¹¹Tasi em a, s'anŋ owr, gbɛkɔ seŋŋ feŋ si b'ɔny low luw ab eke s'am us Jesu jam a sosiem. Etŋ ɛben a yeji, ow b'ɔŋ wel b'ɛkn eke Jesu anŋ owr ey e sos megl a eke b'uw ab em. ¹²Low eke wel b'ɛkn em a el: luw eke am kok low ey em, ke owr anŋ in am kok low ɔny em a.

¹³Nyam Lel dad nine: *M'ɔny ɔmn, ow sosiem mi dad.*[†] ɔmn nyam a ce b'ɔŋ ey si kok low. Ey yeji s'ɔny ɔmn, ow sosiem s'am dad. ¹⁴Ɛɛ, s'uw any eke Nyam ek'igbm ɛs Kɔtɔkɔ Jesu luw em a, ey yeji b'ow igbm ey luw em in ab, etŋ ɔny lel ey ab, li b'ow l'ot l'ok ey es ow e saw. ¹⁵Gbre feŋ eke s'am ij a ɔny sosiem, yec'etŋ ke Nyam ec'ów amamn a eke am agb eb es a, ɔŋ seŋŋ feŋ am ɛnyn nɔkɔ ɔŋŋ in bia, ke ókar af ɔny feŋ kɔklmn in.

Sos ówm ey es luw ec'any af

¹⁶Na sosiem anake sos ówm ey es a. Etŋ eke ey e sos megl a am uŋ tɛl tɛl yeji, yec'a ek'el ey ec'abŋ em ec'a, lɛŋŋni nyam nyam feŋ b'el owr. ¹⁷Ɛɛ, ey e yɛfenyna em e gbɛɛ ij nɔkɔ a ɛw fuɛfuɛ etŋ bibn seŋŋ tɛl ɛɛ, gbɛkɔ ow bi bebm anygbɛl liplemu nyam ey eci. Anygbɛl ikŋ a b'anŋ seŋŋ feŋ etŋ l'agb nɔkɔ l'akm ey e yɛfenyna e gbɛɛ ij a feŋ. ¹⁸Ey, s'ólŋm yec'a eke wel ɔtu eke k'ɛkn ab es, kɔ yec'a eke wel ɛknm a s'am ɔl es. Tasi em a, yec'a eke wel ɔtu eke k'ɛkn a íbnm nɔkɔ, kɔ yec'a eke wel ɛknm a b'anŋ seŋŋ feŋ.

Afr e sos megl a e low

5 ¹Wus af aŋa, s'ir sos megl nyam ek'anŋ ɛse ndey lel em ɛl[†] eke lɛŋŋ nyam b'ow ufŋ es ab em. Gbeɔɔ s'uw any eke afr Nyam ɛw ey ɛl

[†] 4.6 Ɛkn Nuŋ ɔb 1.3. [†] 4.13 Ɛkn Selu 116.10. [†] 5.1 ndey lel em ɛl: ow el ɛl mum nyam eke wɛl bi kok ndey lel em oglog gbɛd em, eke wɛl k'ɔnym ɛl tasi eke k'ɛru em a. Pɔl in obi yeji, kok mel akpasu na e juma.

nyam eke b'ow anɲ sɛɲɲ fɛɲ ab es. Êl eke Nyam us in obi, ke ow elm agɲ ec'abu usm. ²Sicaca em a, s'am ikɲɲ sɔmu,† etɲ s'am ɔɔl ey e lec fɛɲ em eke si k'oc mob sus em ejec'a s'ew sos af, mob sus em a ek'el ey ec'afr ec'el a. ³Ɛɛ, low na anake s'am ɔɔl es a, yec'etɲ ke si k'élmn abɲ eke ɔnym sos megl. ⁴Lɛɲɲ na em eke s'iir ey e wus aɲa ec'êl ab em a, s'am ikɲɲ sɔmu ɛɛɛ ɛɛɛkɲ leg leg ec'ew ɛs anɲ af. Ow elm ke s'am erur eke si k'uw ke si k'ɔnymn sos megl eci. Nɲaɲ, s'am erur eke si ki sus ey ec'afr e sos megl a ɛɛɛ mob sus em af, yec'etɲ ke sel ek'ɔnym uwr a ɔny ey e sos megl a eke b'uw a emn. ⁵Nyam in obi anake bɛbm ey eb ir na eci sos a. Etɲ n'ɔɲ ey Abɲ Lala eke el aja a eke li b'ow n'ɔɲ ey a eci asmanu.

⁶Ow sosiem a, sɛɲɲ fɛɲ sos es atr iy ey em gbɔɲ. Gbɛkɔ ey s'uw any, lɛɲɲ na em eke s'iir ey e sos megl na em a, si kpab es Ɛs Kɔɔkɔ e lís. ⁷Tasi em a, ɔmn em s'am ir eb, kɔ ow elm es eke s'am ɛkn ab em. ⁸Ɛɛ, sos es atr iy ey em gbɔɲ etɲ s'am erur tasi eke si k'ɲgbɔɲ sos megl na em, s'im s'ir eb Ɛs Kɔɔkɔ eci saw. ⁹Gbɛkɔ low kɛkɛ eke s'am erur a el ke ey owi aw'r, eke s'anɲ sos megl na em etɲ s'anm em yeji. ¹⁰Ey fɛɲ ow ibrm eke si b'ow s'imn Krist e jej ok a ec'any af, yec'etɲ ke ɛɲɲ ɛɲɲ ɛɲɲ yec'a ek'it eke k'ebmn, in ec'ow amamn lel eɲɲ eke li kok in e wus aɲa ec'eb ir ab em a.†

Nyam ɛcr Krist em ɔny okr ey em in ab

¹¹Êlum Nyam ɔmn em a, s'uw low yec'eke ow am dad ab any. Na sosiem anake s'am ɔl elel eke si ki dadr ow e low ok agɲ es sos em a. Nyam uw ey any igɲ nuɲ etɲ l'uw any eke s'ɔny nɛny nyam, ɔny yeji m'am ɔmn eke ɔny e mɛrm ab em, uwr any ɛben. ¹²Ey, emɛny si k'ow s'ɔlm eke si k'aw abusu s'eb, kɔ s'am erur eke si k'ɔny ɔny abusu ntɔtɲ ok ɔny ey eci, yec'etɲ ke ɔny low dadr ɔɲɲ agɲ a eke b'ew sos ow eke wel b'ɛkn nyamn em a eci, ke ow elm ow a eke b'anɲ ɛɲɲ erm em ec'a. ¹³Eke agɲ am dad eke eɲ em in uɲ ey, ke Nyam sosiem eci. Etɲ eke wel am ot ey ány es oku, ke ɔny e low nimamn eci. ¹⁴Erur eke Krist ɔny ey ec'a am ucu ɔny ey es, anke s'uw any tasi eke ɛɲɲ nyam ɔɔ uw agɲ fɛɲ eci; ɛɲɲ a el Krist, etɲ ey fɛɲ in e luw a el ey eci. ¹⁵L'uw ey fɛɲ eci, yec'etɲ ke agɲ ek'anɲ owr a k'irm eb el obi el obi ec'ij, kɔ ke -l'ir eb Krist ek'uw ke igb luw em el ec'a eci.

¹⁶Low na sosiem anake jam aɲa, si k'ow si lerm ɛɲɲ ɛɛɛ lelel ek'agɲ bi lɛɛɛ ɛɲɲ ab af a. Etɲ ek'ow el ɛben anake si ler Krist a, ke jam aɲa, ow elm ɛben s'am lerm'n ij. ¹⁷Ow sosiem, eke ɛɲɲ nyam okr af Krist ab, n'anɲ ɛɛɛ ɛɲɲ eke Nyam kokr em af. Low yec'eke el lisig a uwr, etɲ yec'a ek'el owr a eb usu. ¹⁸Amua fɛɲ Nyam ogɲ ow b'anɲ ow. L'ɛcr Krist em n'ɔny l'okr ey em in obi in obi ab, etɲ l'abul ey agɲ ejec'a lele in ab ec'em okr a e juma. ¹⁹Nawɛ, Nyam erm Krist ow in lele agɲ ab ec'em okr a eci, etɲ l'úsm wel ec'ow ɔbr in e lís a e low jam ij. Etɲ l'abul ey in ec'em okr ec'amani ɔb a.

† 5.2 s'am ikɲ sɔmu: Bèbm Rom 8.23. † 5.10 Bèbm Rom 14.10.

²⁰ Ey s'ann̄ ese érmu eke Krist am erm af. Etñ Nyam b'ecr ey em dad ony odad ese: «Krist e nin em, s'am ok ony merm sabu af, yèbr Nyam ony okr ony em in ab!» ²¹ Krist onym sikpl kaka, gbekɔ Nyam ɔb'r low luw eci ese sikpl es af ey usu iy, yec'etñ ke si b'okr af Krist ab a, Nyam ót ey ese agñ nyim nyim af.

6 ¹ Sica ey eke s'am kok juma Nyam ab a, s'am dad ony eke k'ocr bibm a ek'ejan in ec'abu em a kokar low senyn. ² Tasi em a, Nyam dad nine: Lægñ mamn em a, m'ægñ'ñ nenyim,
etñ sel ejñ e lægñ a yeji, m'eb m'elú'ñ es.†

Sica yefenyina tasi anake el lægñ mamn a, yefenyina anake el sel ejñ e lægñ a.

³ Eke s'erurm ek'agñ ki cak ey e juma a, ow ony ey e low fegñ em, si kok lelel eke si k'elm lirikp egñ kaka fegñ eci. ⁴ Kɔ nana, si bi yegm low fegñ em eke s'el Nyam e juma kok esel. Etñ eben a, si b'ægñ erm susu em sos es ɔw, ses babur, erm mij ebr, ⁵ ɔr eke wél b'or ey, sobel em eke wél b'ok ey lele dedeku ec'af eke b'ok ey ab ab e low s'eb. Si b'ægñ sos es kíkñ erñ erñ, mæmn erum lele namn ab s'eb. ⁶ Si b'ir eb lala em si yegm eke s'uw Nyam e lís ec'ów any; s'on̄y low eku, s'el erm mamnu, Abñ Lala anñ ey ab, s'on̄y erur tasi, ⁷ etñ si b'ɔb low nawre e kokoba, Nyam ec'abusu ab em. Si b'oc yec'a ek'el nyim nyim Nyam ec'any af a, ese ar ogññ ob af, s'im agñ ar oglog si dogññ sos. ⁸ Wel b'usr ey sos oglog wél bi kok ey és. Wel bi dad ey e low ñuñ lel ey e low mamn ab. Wel b'ot ey ayadju, ke low nawre ce si bi dad. ⁹ Wel bi kok ey ese agñ eke wél uwm any af, ke wél uw ey any senyn senyn ce. Wel bi ler ey ese agñ ek'am uw af, gbekɔ si b'ann̄ owr segñ fegñ. Wel b'or ey ey ec'omn a sosiem, gbekɔ wél íbim ey. ¹⁰ Wel b'ekn ey ese agñ eke sos ɔw es af, gbekɔ segñ fegñ si b'ann̄ sos em iññ em. Wel b'ot ey ɔgboru, gbekɔ si b'on̄y agñ ejec'a ony ob. Wel bi tutr eke s'on̄ym ob kaka, ke ey nana anake s'on̄y ob fegñ a.

¹¹ Korent ec'agñ lisijimel, nenyembri nyam em si fig ey ec'erm a si dad ony odad. ¹² S'abl̄m ey ec'erm a ony e lís, kɔ ony anake b'abal ony ec'a ey e lís a. ¹³ Sica m'am dad ony odad ese iy es lel in ec'ey ab af m'ese: kòkr ese ey af, ony yeji figr ey ony e merm a foñ.

Èel cæce Nyam e lís

¹⁴ K'èwr mæcrer agñ a ek'on̄ym omn Nyam em ab ab, k'otumn okrmn eb ir af el ab. Kɔ low nenyembri nyam otu eke k'okr af enyembri yony owi eke Nyam érum ab ab ee? Kɔ usuayl lele ncebn ab b'otu okr af ee? ¹⁵ Kɔ Krist neny otu eke k'okr af **Satan** ab ee?† Kɔ nawre ub es nyam lele nawre

† 6.2 Èkn Esayi 49.8. † 6.15 *Satan*: odad ebl na Grek em a *Beliar*. Grek em ec'odad ebl na otarir es Ebre em ec'odad na ab: *Belial*, ow e nyandré el "ob ɔfr ɔfr". Jwifel oc odad ebl na ese Satan e nin nyam af.

ubm es nyam ab ec'araŋn a low ɔtu eke k'anŋ ee? ¹⁶Bogŋ ec'iririr k'anŋ Nyam ec'êl a lele sinyam yadŋ ec'ab ab ec'araŋn ee? Ey anake s'el Nyam ek'anŋ owr ec'êl a, ese lele eke in obi li dad nine:

Mi b'ow m'anŋ el araŋn ke m'ír eb el ab.

Mi b'ow m'el el e Nyam etŋ -li b'ow -l'el em ec'agŋ.

¹⁷Ow sosisem Es Kɔtɔkɔ dad nine:

Ŋgbroŋn agŋ amua ec'araŋn ke kpábr el es lís!

K'ítŋnin ob yec'eke **aylm** a abu,

etŋ em, mi b'ow m'eb ɔny.

¹⁸Etŋ emeny Nyam Abusu Es dad nine:

Mi b'ow m'el ɔny Es,

etŋ ɔny b'ow el em ec'ey egŋ lel ɔyɔw ab.†

7 ¹Erur em ec'agŋ lisijimel, ów ewar amua fəŋ el ey eci. Ow sosisem a, si yɔyɔg ob fəŋ eke b'ibar ey e sos a lel erm ab ab a es, ke s'êel Nyam eci nimum nimum elum em.

Pɔl sos em am iŋn Nyam ec'agŋ a ec'itŋn a eci

²Kòkr ey usu ɔny e merm ab em! Si kokm enyembri yony yony owi egŋ kaka e lís, si ŋuŋnm egŋ kaka ec'ɔmn, etŋ s'ebm egŋ kaka ec'ob s'ijm. ³Mi dadm odad nene low e mi k'ɔb ɔny eci. Ese lele eke m'ikŋ anym mi dad ab af: ɔny owi anŋ ey erm em, etŋ s'okr af owr anŋ em toŋ luw em. ⁴M'ɔny ɔmn ligbel ɔny em etŋ ntotŋ b'ok'm ɔny eci. Eke s'ɔny ses babur nɔnɔ yeji, m'ɔny sos es atr nɔnɔ etŋ sos em iŋn iy'm em gbɔŋ.

⁵Tasi em a, eke s'im s'ok Maseduan a, s'etŋnm sel es ok kaka. Kɔ nana, gbre etŋ etŋ s'etŋn ese: agŋ eke ok ey af lele erm em ec'erŋn ab. ⁶Gbəkɔ Nyam eke b'atr agŋ eke sos b'ɔw es a sos es a, atr ey sos es Tit ec'ow a ek'anŋ ow ab em. ⁷Etŋ ow elm Tit ec'ow a ɔny cɛ atrm ey sos es, kɔ ɔny e sos a eke atar ir es ec'amani a eke n'ɔŋ ey a yeji. Li dad eke ɔny ɔny em ec'ekn ec'erur nɔnɔ. Etŋ li dad ey ɔny e sos em ey owi low a ek'ey a eci lele em e dogŋn eke dogŋnin'm gbragbra kok em ab ab. Ów amua anake ɔŋ em e sos em iŋn a agb nɔnɔ a.

⁸Tasi em a, eke em e lel es abal el a ɔwr ɔny sos es, ke em, ow e low eym im sos em ij.† Eɛ, m'uw any tasi eke lel a ɔwr ɔny sos es legŋ tɛl eci, etŋ nawre ow e low eym sos em, ⁹gbəkɔ caca em a, m'anŋ sos em iŋn em. Ow elm ɔny e sos es ɔw a sosisem, kɔ eke ɔny e sos es ɔw a ɔŋ ɔny itŋnin es an a sosisem. Sos es ɔw a eke Nyam b'erur in ec'agŋ ec'ab ana, etŋ nene a, ow am yeŋm eke si kokm ɔny low ŋuŋ. ¹⁰Tasi em a, sos es ɔw a eke

† **6.16-18** Èkn Ob Ap 26.12; 2 Samiel 7.14; Esayi 43.6; 52.11; Jeremi 31.9; Ezekiel 20.34; 37.27; Ose 2.1. † **7.8** Lel na eke Pɔl awŋ Korent e Nyamel a s'ɔnym ow anm usu kaka. Lel a eke si b'etŋ 1 Korent a e jam anake ni non lel na ek'irm a. Èkn 2 Korent 2.3 lel ow ec'akr otar ab ab.

b'akpl Nyam sos em a, b'ɔŋ ey s'itɔŋ es an etɔ bi nyimn ey sel eɔŋ em. Sos es ɔw nɛnɛ a ɔtum eke k'ey ey sos em. Gbɛkɔ wus ec'ow ec'erm mij ebr a eci sos es ɔw a, ek'itɔŋm eɔŋ ec'es an a, bi nyimn eɔŋ luw em. ¹¹ɔny eci sos es ɔw a akpl Nyam sos em. Sica lɛɛr ow ec'ey eke ow ɔsu: ow ɔŋ ɔny low es ogɔ kok lele low oc ap ec'ibrm ab! Ow ɔŋ ɔny low sos em ey lele low uru low kok em ab! Ow ɔŋ ɔny em ec'ekn ec'aw lele em e dogɔŋ gbragbra kok em ab! Etɔ ow ɔŋ ɔny low ŋuɔ kok es a eci low ew ɔŋ! Low na em a, yegmn eke ɔnymn low af ok kaka.

¹²Sica m'awɔm ɔny lel eɔŋ a eke kok low ŋuɔ a sosiem oglog eɔŋ a eke wɛl kok low ɔbr a sosiem. Kɔ m'erur eke mi ki yegm ɔny Nyam ec'any af, ekan eke b'erurir ey owi tasi. ¹³Na anake el low ek'atr ey sos es a.

Etɔ sos es atr na e low ek'igɔ af, ke obn ey e sos em iɔŋ a el Tit eci sos em iɔŋ a ek'eɔŋ a. Eɛ, ɔny fɛŋ eyar ir erm es. ¹⁴Nawre, in ec'any af mi dad ɔny ec'odad nɛny ij em, etɔ ɔɔmɔm'ɛs. Sɛŋ fɛŋ si bi dad ɔny low nɛnyembri nyam em, etɔ kin ow e low ek'ow ism ab: m'ɔny low ij eke mi dad ɔny e lɛs owi nɛny ij em Tit ec'any af. ¹⁵N'am ɔkn elel a eke ɔny fɛŋ elumn low lele ɔny ec'eelɛ a eke ebr ir elum ligbɛl em lele sos ufɔ em ab a. Etɔ ow sosiem in ec'erur a e n'ɔny ɔny ec'a emɛny agb obn. ¹⁶Sos em am iɔŋm eke m'ɔtu eke mi k'ɔmn ɔny low fɛŋ em a.

Jerusalem ec'ɔmn esɛl a ec'abu elum a

8 ¹Agɔ lisijimɛl, kin yec'eke s'am erur eke k'uwr any: Nyam elu in ec'erm mamn a ɔkm bibm eke n'ɔŋ Maseduan e Sinyamel ab em. [†]
²-L'ɔbr ses babur ɔɔkɔ esɛ ebm ekn af, gbɛkɔ ɔmn esɛl a sos em iɔŋ iy em gbɔŋ. -L'ij gbɔr ɔɔkɔ, gbɛkɔ -l'ɛlu erm mamn ɔny ɔɔkɔ ɔkm el ec'ob eke -l'apr ab em. ³-N'ɔŋ yec'a eke -l'ɔtur a, etɔ -n'ɔŋ ow afɔ es yeji, m'ij ow e danɔku. Ow elm lɛc em wɛl ɔnym el -n'ɔkm; kɔ el obi tasi ec'erur em -li kok. ⁴Tasi em a, -l'ibrm ey atrm em eke el yeji, el ec'abu k'anɔ Jerusalem ec'ɔmn esɛl a ec'abu elum owi ab em. ⁵-L'ikɔ anym -l'ocr el sosi -n'ɔŋ Eɛ Kɔɔkɔ, etɔ ow e jam a, -l'ocr el sosi -n'ɔŋ ey yeji, esɛ elel eke Eɛ Kɔɔkɔ erur ab af. Etɔ na el low eke s'ɔmnm kaka. ⁶Na sosiem anake s'atr Tit sos es eke li k'ewl l'ow ɔny ogɔ yogɔ, ke l'úwar ɔny ec'erm mamn ɔny e juma mamn a eke l'ɔb nuɔ a. ⁷ɔny ijr lɛc ów ów a fɛŋ em: ijr lɛc ɔmn em, Nyam odad dad em, uwr Nyam ec'ow ab any, sɛŋ fɛŋ bebmn sos low kok eci, etɔ ɔny ey ec'erur yeji. Na sosiem, ow it eke ki yegmn ɔny e lɛc ij a, ɔny ec'erm mamn ɔny ab em yeji.

⁸Ow elm ol m'ɛwm m'ɔkm ɔny, kɔ Nyamel beb a ec'eelɛ eke gbragbra kok em kokr low a cɛ m'am dad ɔny. Nɛnɛ ke m'ɔŋ ɔny abusu yegmn eke ɔny ec'erur a el nawre tasi. ⁹Tasi em a, ɔny uwr ey Eɛ Kɔɔkɔ Jesu Krist

[†] 8.1 *Maseduan e Sinyamel*: ow el Sinyamel esɛ: Filip baɔŋ ec'a, Tesaloni baɔŋ ec'a lele oglog Bere baɔŋ ec'ab ab.

e bibm a lele erm mamn ab ab any. L'el gbrenɲɲbi, gbekɔ ɔny sosiem l'egɲ gbɔr l'eb, yec'etɲ ke in e gbɔr a ɔɲ ɔny eel egbrenɲɲbi. ¹⁰Em ec'eled eke m'am ekan low a el, ke kókr low a ek'ɔbr nuɲ lakpo jam a yibar, anke ɔny eel agɲ krɛkrɛ eke is ob ap na e tutr a, etɲ ɔny ce eel emeny agɲ krɛkrɛ ek'ɔb nuɲ kok ow e low. ¹¹Eke isr ow e low a, yegmn ɔny ec'erur ek'ɔnyn a. Ow sosiem erur nyam ab em ce, ùcur low a ɔnyn es toɲ ke íɲɲɲ nuɲ egɲ egɲ ec'ob ek'ɔny ab em. ¹²Eke wel b'ɔɲ erm frɔɔ em a, Nyam b'ekn ow e s'ɔny a etɲ li b'eb ow eke si b'ap a. L'íbram eke si k'ap ow eke s'ɔnym a.

¹³Ow elm ke wel ɔɲ ɔny ijr gbɔr agɲ ejec'a ec'abu elum a sosiem. Njan, kpeɲ kpeɲ eke k'eel a wel am ɔl. ¹⁴Lɛɲ na em a, ow a ek'ɔnyn bubu af a ɔtu eke k'elum agɲ ejec'a ek'ɔnym a abu, yec'etɲ eke lɛɲ nyam ɔnyn es abur etɲ el -n'ɔny ob ɲɔɲ a, ke el yeji -l'elum ɔny abu. Nene ke ɔny feɲ éel kpeɲ kpeɲ. ¹⁵Nyam Lel dad nine:

ɛɲ a eke ot ɲɔɲ a, ɔnym ob ij afɲnm es.

ɛɲ a eke ot tel a, ɔpim ob ij lɛɲ kaka.†

Tit lele kretienel ejec'ab im Korent

¹⁶M'am ɔɲ Nyam bia, anke n'ɔɲ Tit gbragbra kok nyam a ce eke li k'oc l'elum ɔny abu, l'akm em obi ec'a e m'ɔny a. ¹⁷Tit egɲ ey ec'erm a ek'el ɔny ec'ow ekn a emeny eb, etɲ n'am ogɲ es eke kpeɲɲ li k'ow ɔny ogɲ yogɲ. ¹⁸S'am ɲɲ'n l'ow egɲ lisijim nyam ab. ɛɲ lisijim a, Sinyamel a feɲ b'aw'r, in ec'Amani Mamn ec'ɔb e juma kok a sosiem. ¹⁹Etɲ ow elm na ce! Sinyamel a sɔsum oc'r, yec'etɲ ke l'íɲɲ ey ab s'oc bibm na s'im. Ow el juma eke si ki kok, ke ám elu ɛs Kɔɔɔɔ in obi ec'anygbel ɔkm, ke ám yegm ey ec'abu elum ec'erur e s'ɔny a. ²⁰Wel abul ey os ɲɔɲ, etɲ s'am erur eke wel kí cakm ey ec'eled eke s'am kokr ow e juma a. ²¹S'am ɔl low yec'eke akpl ab es, etɲ ow elm Nyam ec'any af ce, kɔ agɲ ec'any af yeji.

²²S'ɔɲ ey lisijim nyam yeji igɲ Tit lele egɲ lisijim nyam a eke k'ew'l' ab ab af. ɛɲ lisijim na yegm ey sakp ɲɔɲ in ec'eled eke li b'erur tasi l'elum agɲ ejeci abu a. Caca em a, li b'erur es ogɲ em tasi l'elum agɲ abu, anke n'ɔny ɔmm ɲɔɲ ɔny em. ²³M'am ɔɲ Tit ek'el em lawl ke bi kok juma em ab ɔny sosiem ec'a, lele agɲ lisijimel ejeci amua ek'el Sinyamel ec'erm esel a ow ekn ɔny. El feɲ Krist ec'anygbel a e juma -n'am kok. ²⁴Ow sosiem yegmn el eke b'erurir el, yec'etɲ ke ow ɔɲ Sinyamel a úw any nawɛ, ke -l'ekn yej'eke ntotɲ ɔtu eke k'ok ey ɔny eci.

Nyam b'erur egɲ eke b'ɔɲ sos em iɲɲ em a

9 ¹Jerusalem ec'ɔmm esel a ec'abu elum eke wel k'oc im ɔɲ ec'a,† ow ebam eke mi k'awɲ ɔny ow e lel. ²M'uw ɔny e sow tutr amamn ab

† 8.15 Èkn ɔkm Ok 16.18. † 9.1 Èkn Rom 15.25; 1 Korɛnt 16.1-4.

any. Maseduan ec'agŋ lisijimel a ec'any af, m'ij neny mi dad el eke Akayi[†] ogog ec'agŋ lisijimel a, lakpo jam etŋ bebŋm sos abu elum na ec'os a eci. Etŋ ony e low na eke ogŋŋ es egŋŋ ebr a, atr agŋ ƙoƙo sos es. ³Ow sosiem m'erm agŋ lisijimel amua,[†] yec'etŋ ke -l'ekŋ tasi eke bebŋm sos. Ow ŋŋ ke wɛl ɛkŋ eke ey e neny a e s'ij ony ec'a elm ɔfr ɔfr. ⁴Sica eke Maseduan ec'agŋ igŋ'm ab ow etŋ ekŋ eke bebamŋ sos, ow b'ow ony ey ɛs ƙoƙo eke s'oc ɔmn s'elu ony em, etŋ ony yeji ow b'ow el ony ec'ɛs. ⁵Na sosiem m'onŋ tutr eke ow akpl ke m'fkŋ anym m'onŋ agŋ lisijimel amua ów ony ec'araŋŋ bebŋm ob ap mamŋ a eke dadr ow e low ɛwr es a, ba mi b'anŋ m'ow a, ke feŋ iy neny ŋŋ, ke wɛl ɛkŋ eke ow el erm frɔɔ em ɔŋŋ, ƙo ow elm atrm em.

⁶Kin yec'ek'it eke k'uwr any: egŋ eke b'ewl tɛl a, b'ub tɛl, etŋ egŋ eke b'ewl ƙoƙo a, b'ub ƙoƙo. ⁷Ow akpl ek'egŋ egŋ k'onŋ ese lelel eke li tutr in ec'erm em ab af, ow k'elm sos es ɔw em lele atrm em ab. Tasi em, Nyam b'erur egŋ eke b'onŋ sos em iŋŋ em a. ⁸Nyam ony abusu eke k'onŋ ony ów amamn feŋ ow afŋŋ ony es. Ow ŋŋ seŋŋ feŋ onŋn ow ek'it a, ke onŋn ow bubu af, ócr ƙokr ów amamn. ⁹Nyam Lɛl dad Nyam ec'egŋ e lís nine:

Li b'onŋ ɔgbɔru erm mamŋ ony em,

etŋ li bi ƙok seŋŋ feŋ yec'ek'el nyim nyim a.[†]

¹⁰Nyam anake b'onŋ egb ewl es egb ey lele futufutu eke li k'ij ab ab a. Ony yeji in ɛɛ li b'ow n'onŋ ony egb ey, li ƙok ow ɛny ke n'onŋ ow agb. Etŋ ebeŋ a, ony ec'ów nyim nyim e ƙok a b'ow ɔsu ey amamn ƙoƙo. ¹¹Kaka feŋ, Nyam b'ow ɔŋ ony onŋn ob, etŋ b'ow elul ony ec'erm mamŋ ony a ɔkm. Etŋ agŋ ƙoƙo b'ow ɔŋ Nyam bia sob ap amua eke si b'ow s'onŋ el ony e nin em a eci. ¹²Ob ap na em, am elumn Nyam ec'agŋ lala a abu. Etŋ ow elm ke ŋŋŋ el feŋ a eke -n'onŋm a ɛɛ, ƙo emeny b'atar el sos es eke -li ƙi ŋŋŋ Nyam ƙoƙo -l'ɛlu ow bia. ¹³Ów amua feŋ sosiem, -li b'ow -l'ekŋ juma na e leg a etŋ -li b'ow -li ƙoƙlm Nyam, aŋke bi ɛɛr erm mamŋ ony em yec'a eke onŋn a, Jerusalem ec'omŋ esɛl a lele ejec'a feŋ ab, etŋ am yegmŋ eke b'elumn Krist ec'Amani Mamŋ a. ¹⁴Nyam in ec'erm mamŋ ab em ɔŋ ony in e bibm a ow bubu af. Ow sosiem, -li b'ow -li yegm ony el ec'erur a, Nyam eke -li bi ŋŋŋ -n'onŋ ony ab em. ¹⁵S'onŋŋ Nyam bia in ec'ob ap mamŋ a eke wɛl ƙ'otum ocm bebŋm ab a eci.

Pɔl am dogŋŋ sos agŋ a ek'am okr ów af a e lís

10 ¹Em Pɔl, em anake m'am ibrm ony low Krist ec'erm frɔɔ lel erm mamŋ ab ab em a. Wɛl am dad eke em b'anŋ tiŋ eke em b'anŋ ony ec'any af a, ƙo em b'anŋ akpoj a, neny in b'ɔtu'm ƙoƙo. ²M'am ŋŋŋ ony, ƙ'onŋ mi k'ɛw gbagba legŋ a eke mi b'ow m'ow ony ec'araŋŋ a! Agŋ beb bi

[†] 9.2 Akayi: ɛkŋ 2 Korent 1.1 lel ow ec'akr otar ab ab. [†] 9.3 agŋ lisijimel amua: aŋa Tit lele agŋ lisijimel yony ab ab e low wɛl am dad, ɛkŋ 2 Korent 8.17-24. [†] 9.9 ɛkŋ Selu 112.9.

tutr eke s'am kok low ese wus ec'agη es el af. Ee, agη nene e lís a, m'am tutr eke mi b'ow m'elu em ec'erm susu a okm etη ek'ow it yeji mi b'ow m'ew gbagba. ³Nawre eke s'el agη gηη, kō mum a eke s'am ogη a elm agη em eci. ⁴Mum a e mob a eke s'am ot s'ogηη a elm agη ec'a. El e lec a, Nyam ogη a ow b'anh ow ηuηη ob fηη eke b'atar in ab a. Si bi ηuηη sow tutr yadη em a fηη. ⁵Si b'ony tutr fηη e b'ol eke k'edηη agη Nyam ec'any uw a s'oc es. Tutr fηη eke b'atar Nyam ab a, si b'ony'n lec em eke li k'elum Krist. ⁶Etη eben a, s'inym es eke low eluam fηη ec'a, si k'ew low s'ōη egη, gbeko ow akpl eke k'onyη abusu élul ony ec'elum a nimum okm ye.

⁷Lèer ów a ec'elel ek'anhη a senyn senyn! Eke egη nyam ony tutr eke in sony ce l'el Krist eci, ow it ke emeny li tútr senyn senyn: ey yeji s'el Krist eci ese in af. ⁸Es Kōtōkō ony ey abusu eke si k'ōη ony e Nyamel a agb okm em, kō ow elm in e ηuηη eci. Nawre eke low na ony ntotη ok'm nōnō, gbeko mi k'ow m'ururm és na sosiem. ⁹M'erurm eke k'ekan'm ese egη eke b'ok agη erηη lokm, in e silēl e li b'awη ab em af. ¹⁰Tasi em a, agη beb bi dad ese: «Pōl e silēl a b'ew kpaη kpaη lele lec em ab. Gbeko eke li b'anh ey ec'araηη a, li b'ew fuēfue etη sodad eke li bi dad a élm low kaka.» ¹¹Ke egη a ek'am dad odad nene a, úw low na gbe any: eke si b'anh kpekpe a, si b'awη silēl kpaη kpaη. Legη eke si b'ow s'anh ony ec'any af a, si b'ow si kok eben kpeη.

¹²Agη beb b'awr el sosi nōnō, si k'otum si bebmnm el ab oglog s'otm el es. -Li b'ocr el sosi ese ob bebmnm ob af -li bebmnm el sosi, ke -n'onyη el sosi -l'igbl ogη -l'ekn. Na nuη em ηuη! ¹³Ey ec'a, si k'ow si yebm ey eci ntotη ok a iim nōnō nene. Eke Nyam nyimn ey s'ow s'ehη ony a, li yegm ey yogη ek'ey e juma e l'abul ey a k'im ok a, etη si b'ow s'oc ereb a ese ey ec'ob bebmnm ob af. ¹⁴Blel s'owm toη s'okm ony ogη aηa ana, wel otu e k'ony tutr dad eke s'am afη ey ec'abusu a ec'ereb ab es. Kō ey tasi anake s'ikη anym s'oc Krist ec'Amani Mamn a s'ism ony ab a. ¹⁵Eben a, ey s'ewm sos ese eben agη ejeci e juma e kok a e low ce es am ibrm af. Kō ey s'am okm eke ony ec'okm a b'ow obn etη emeny s'otu eke si ki kok juma nōnō ony ogη yogη. Gbeko s'erurm eke si k'afη ereb a eke Nyam ew ony ey ab es.†

¹⁶Ow e jam a, si b'ow s'im s'ob Amani Mamn a e kokoba susu eke ibn akm ony ogη aηa. S'erurm eke si ki kok juma agη ejeci e juma kok usu a, ke s'ew sos ów a eke -l'ikηη anym -li kokr a eci.

¹⁷Eke egη nyam erur eke k'ew sos, ke l'ew sos Es Kōtōkō sosiem.† ¹⁸Tasi em a, ow elm egη a eke b'awr in sosi a wel áwm, kō egη a eke Es Kōtōkō b'aw a.

Pōl lele erm esel ayadηu ab ab

11 ¹Oy! Blel k'égηη ebr ke em yeji mi dád ów ese nuη em ηuη es af! Ee, na ec'a ègηη ebr'm eben! ²Erur eke m'ony ony ec'a b'ogη

† 10.15 Èkn Rom 15.17-21. † 10.17 Èkn Jeremi 9.23; 1 Korent 1.31.

uweryɲ, etɲ el uweryɲ eke b'any Nyam ogɲ ow. Tasi em a, igɲ ebiu nyam ce m'ewar ɔny in e low m'ew es: in l'el Krist. Eɛ, mi b'ow m'oc ɔny mi yegm'n esɛ dedyɔwli ek'itam em kaka af.[†] ³Gbɛkɔ ɔkan low na: lorɲn oc yadɲ em eju Eɓ. Ow ɔɲ erɲn am ɔny'm ek'ony yeji, wɛl ki dad ɔny sow tutr yadɲ, ke ow ɔny kpab ɔny es ów cɛcɛ a lele lala ab ab eke eɲan Krist ab ec'af okr ab em a e lís. ⁴S'ɔb ɔny Jesu ec'amani, eɲan Abɲ Lala etɲ ubr Amani Mamn a nawrɛ. Kɔ sica b'ow egɲn ebr fafa nɛnɛ eke egɲ ejeci nyam k'ow dad ɔny Jesu ejeci nyam ec'odad, abɲ ejeci nyam ec'odad, ke ɔb ɔny amani ejeci nyam eke irimn ow e low lɛgɲ kaka ab ee?

⁵Kɔ em e tutr em a gbɛ, mi k'eknm eke ɔny eci “**erm** esɛl egbɛl” a k'ony any akm im.[†] ⁶Nawrɛ eke nɛnym okm im es odad dad em esɛ el af, gbɛkɔ Nyam ec'any uw ec'a, in yeji low ejeci! Etɲ na, lɛgɲ fɛɲ si yegm ɔny kpata low fɛɲ eke si kok ab em.

⁷Eke m'ɔb ɔny Nyam ec'Amani Mamn a, em m'is es aɲke m'ibram ɔny os kaka. Gbɛkɔ ow el sos eke mi k'usr ɔny eci. Kɔ na low ɛyr e mi kok ana ee? ⁸Eke m'am kok juma ɔny ogɲ a, Sinyamel ejeci anake ɔɲ'm os a, etɲ m'oc el ec'os a m'elum ɔny abu. ⁹Ke ɔny ec'araɲn eke m'anɲ a, m'ony os ec'es abur cɛ, gbɛkɔ m'ibram ɔny low kaka. Maseduan ec'agɲ lisijimɛl ek'anɲ ow a ism'm fɛɲ a eke m'ony ow ec'es abur ab ab. Sɛgɲ fɛɲ mi kok elɛl eke mi ki legm ɔny etɲ m'erur eke lɛgɲ kaka mi ki legm ɔny. ¹⁰Ntotɲ am ok'm ow eci etɲ Akayi wus ogog a ec'egɲ kaka k'ɔtum ɔbm im yadɲ ɔnym em eci ntotɲ na ocm es.[†] Low nawrɛ tasi m'am dad aɲke m'ony low nɛnyembri nyam ek'anɲ Krist em a. ¹¹Bla sosiɛm m'am dad odad nɛnɛ ee? Eke m'erurm ɔny a sosiɛm ec'ee? Njaɲ, Nyam uw any eke mi b'erur ɔny. ¹²Etɲ mi b'ow m'ucu m'ony es m'am kok eɓɛn, ow ɔɲ agɲ ek'am ɔl abusu eke k'ɛru es ke ij nɛny eke el erɲ em si bebmn a, k'ɛɲnm abusu na kaka! ¹³Agɲ amua el erm esɛl ayadɲu lele juma kok esɛl ek'ony enyembri yony yony ab. -Li bi kok nyandre esɛ Krist ec'erm esɛl cɛ wɛ'n el af. ¹⁴Nawrɛ, low kaka ɔnym any iti aɲa, aɲke **Satan** in obi yeji bi kok nyandre esɛ usuayl ec'**af** erm es cɛ ow'n el af. ¹⁵Etɲ in e juma kok esɛl ec'a yeji eɓɛn cɛ. Ow ewm any iti eke -n'am kok nyandre -l'el juma kok esɛl ek'am kok yec'ek'el nyim nyim Nyam ec'any af a. Gbɛkɔ el ec'owr anɲ a b'ow uwr esɛ elɛl ek'ow it eke k'ɛbm el ab af, el ec'elɛl eke -li kokr ab em.

Pɔl e gbɛre erɲ erɲ ek'ij

¹⁶M'am ebr em m'ɛsɛ: kì tutar eke nuɲ em uɲ'm! Oglog ègɲn ebr eke nuɲ em uɲ'm, yec'etɲ ke em yeji m'ɔtu m'ij nɛny tɛl. ¹⁷Sica odad na eke m'am ow mi dad a, mi dadm esɛ elɛl eke Ès Kɔtɔkɔ erur ab af, kɔ esɛ nuɲ

[†] 11.2 Bèbmn Efes 5.25-27 ab. [†] 11.5 “*erm esɛl egbɛl*”: aɲa Korènt e Nyamel ab em eci low yegm esɛl beb a eke am yegm agɲ amani mamn ejec'a e low Pɔl am dad. [†] 11.10 *Akayi*: Korènt baɲn a Akayi wus af ow anɲ; èkn 2 Korènt 1.1 lel ow eci akr otar ab ab.

em ɲuŋ es af. Gbɛkɔ m'ɔny ów tasi e m'ɔtu eke mi k'eb ow af m'am ij neny. ¹⁸Agɲ ɲɔɲɔ b'ij neny agɲ em ec'ów sosiem, ow sosiem em yeji mi b'ow m'ij neny. ¹⁹Ɔny eke b'ocar ɲny sosi esɛwru a, ɲny obi em b'ɛgɲɲ eɲ em eɲuŋ esɛl ebr! ²⁰B'ɛgɲɲ ebr wɛl kok ɲny esɛ madu af, wɛl eb ɲny ob fɛɲ ek'ɔnyɲ a, wɛl iy ɲny mill! B'ɛgɲɲ ebr wɛl itar ɲny any, wɛl dɛdɲ ɲny any af! ²¹Ɔs am ɲny'm eke mi ki dad, eke s'ɔnym sos si kokm ɛben a!

Eke eɲɲ nyam am eɲɲ eb ij neny low nyam eci, aɲa m'am dad odad esɛ nuŋ em ɲuŋ es af, em yeji mi b'ow m'ɛgɲ m'eb mi kok ɛben. ²²-L'el Ebre eyŋ, em yeji m'el! -L'el Israel eyŋ, em yeji m'el! -L'el Abraham ec'alaw, em yeji m'el! ²³-L'el Krist e juma kok esɛl, em m'el m'akm ɛl fɛɲ! Ɖɲɲ low na eke aɲa m'am m'ow mi dad m'usr af a yeji, anɲ esɛ nuŋ em ɲuŋ owi af: mi kok juma m'akm ɛl fɛɲ, m'ɛy sobel em sakp ɲɔɲɔ m'akm ɛl. Ɖr yeji, em wɛl ɔr'm sakp ɲɔɲɔ akm ɛl, ɛɲɲ sakp ɲɔɲɔ ar okr'm es akm ɛl. ²⁴Sakp yen eke Jwifel iyr'm ɲgbre likɲ lele lew libarm ab.† ²⁵Sakp nyahan eke Rom eyŋ ɔr'm lɛc em lɛc em, akp nyam eke wɛl wɔwl'm mebn em ec'ibi eci. Sakp nyahan eke mij blel oc'm, ɛɲɲ akp nyam ec'a, m'anɲ lɛgɲ owr nyam lele ncok nyam ab mij em.† ²⁶Ɔm eci usu im ɲɔɲɔ ab em, ar okr'm es sakp ɲɔɲɔ: simij ec'any af, agɲ ibiu ec'any af, em lisijimɛl Jwifel em oglog ɛl ek'ɛlm Jwifel em. M'ɔbr ar eb eb em, loj em, okij af lele agɲ lisijimɛl ayadɲu ab e lís. ²⁷Mi kok juma eke kíkɲm sos es ɛɲɲ sakp oglog m'ɔtum m'ɛrum mɛmɲ. Namn lele mij amn ab ɲny'm ɛɲɲ sakp oglog m'ɔtum m'ɛɲɲm ob m'ijm. Lɛfr ɲny'm ɛɲɲ m'ɔnym mob mi susm. ²⁸Ɖɲɲ mi dadm low a tasi ek'ɔny any a ec'odad: sɛgɲ fɛɲ mi b'ɛbr em e Sinyamel a fɛɲ e low ec'erm mij. ²⁹Eke eɲɲ nyam cɛ ɛw fuɛfuɛ, em yeji kɛkɛɲ m'ɛw fuɛfuɛ. Eke eɲɲ nyam cɛ ɛy sikpl owi em, ow e low ám ɛy'm sos em ɲɔɲɔ.

³⁰Ek'ow it neny ij, mi b'ow m'ij neny eke m'el fuɛfuɛ. ³¹M'ɔnym yadɲ, Nyam ɛy Ɔs Kɔtɔkɔ Jesu ec'Ɔs uw any. Si kɔklm'n akpo akpo fɛɲ! ³²Eke m'anɲ Damas eb em a, eb ɲsu es ek'am kok es ɛw es Aretas e juma a, ɲɲ wɛl am ɲsu eb a e masanya a fɛɲ em ec'ɛdɲɲ eci. ³³Gbɛkɔ agɲ lisijimɛl a ɲɲ wɛl ɲny elu'm ulu ligbel nyam em, ɛɲɲ usm'm es finetr em, eb a e lakp ogog kpakp a e jam a, ɛɲɲ m'ɔtu m'akm'n.†

Pɔl sos em am iɲn eke li k'ij Krist eci gbɛɛ

12 ¹Kɔ ow it eke mi k'ij neny ee? Ow k'ow elm im low kaka. Gbɛkɔ m'am m'ow mi dad ów eke Ɔs Kɔtɔkɔ yegm'm m'ɛkn lele ow eke

† 11.24 Ɖkn OI Ɖkn 25.3. *Jwifel iyr'm ɲgbre likɲ lele lew libarm ab a*: ol ɛdɲɲ eke wɛl k'iy eɲɲ eke kok low a ɲgbɛɛ ow afɲ eɲɲ yony es. Ke ow áyl'ɲ sos em tasi eke iyr'm ow afɲɲ es a, Jwifel am iyr eɲɲ a ɲgbɛɛ a ba ow b'ij likɲ lele lew libarm ab a ke -l'ɛw abu es. Ow sosiem anake wɛl bi dad *ekɲ yony ke ɲny nyam oc es em a*. † 11.25 *Rom eyŋ ɔr'm*: bɛ̀bɲm Ob Kok 16.22-23 ab; *wɛl wɔwl'm mebn*: Ob Kok 14.19-20; *mij blel oc'm*: Ob Kok 27.39-44 em a, si b'awl mijɛɲɲ nyam eke mij oc im e low, gbɛkɔ Pɔl nɔn lel na oc es gbunɲ ɛɲɲ low a ɛy. Aɲa ow am yegm ɛy eke ow elm Ob Kok 27.39-44 em e low a li dadm, kɔ sakp ɛjɛci nyahan eke mij blel oc'r a e low anake n'am dad a. † 11.33 Ɖkn Ob Kok 9.23-25.

n'ony l'ok ɔkm ab ab e low. ²M'uw Krist e jam us es nyam any,[†] etɔ ow ij akpo lew yar ŋ, Nyam ɔny eɔɔ na uyum afr kpekpe. Kɔ in e sos megl ab ab ee? M'uwm any. Kɔ ow elm in e sos megl ab ab ee? M'uwm any, kɔ Nyam gbe uw any. ³⁻⁴M'uw any gbe eke Nyam oc eɔɔ a im afr ec'usu mamn a. Kɔ in e sos megl ab ab oglog ow elm ow ab ee? M'uwm any, kɔ Nyam gbe uw any. Yogɔ, l'iri sodad eke eɔɔ e neny k'ɔtum dadm. Ow el sodad eke eɔɔ kaka ɔnym abusu eke ki dad. ⁵Eɔɔ nene na eci gbe mi b'ow m'ij neny. Gbekɔ em ec'a, elel eke m'anɔn a sosisem mi b'ow m'ij neny em e fuefue el a eci. ⁶Eke batɔ m'erur neny eke mi k'ij a, mi k'ow m'ijm nyamb, low eke el nawre a ce mi b'ow mi dad. Gbekɔ m'ijm neny, yec'etɔ ke wel dád em e lís owi, ow a ce eke wel am ekn'm mi kok lele ow a ce eke wel am iri mi dad ab ab af, ke low ejeci kaka k'igɔm af.

⁷Ów a eke Es Kɔɔkɔ yegm'm m'ekn a agb ɔɔɔ. Gbekɔ l'erurm eke mi k'ij neny na eci. Ow sosisem l'oc ebm ekn nyam l'elu'm sos em, b'ijr'm gbre ese mirɔ eke b'ub es anɔ eɔɔ sos em ab af. Etɔ ow anɔ ese **Satan** ec'erm es nyam eke wel ɔɔ eke k'ɔr'm ke éɔɔn'm neny ij af. ⁸Sakp nyahan eke mi ɔɔɔ Es Kɔɔkɔ eke k'ɔny oc'm es gbre ij na em, ⁹kɔ li dad'm nine: «Em ec'erm mamn a ce ɔɔɔ. Eke b'anɔ fuefue a, yogɔ em tasi anake em e lec a b'ey ɔkm a.» Ow sosisem, em e neny ij a tasi b'ow el em e fuefue el a, yec'etɔ ke Krist e lec a áɔɔm af. ¹⁰Na sosisem m'am eɔɔ feɔ m'eb sos em iɔn em: lec ɔnym, wewr, ses babur, em ec'ɔmn a sosisem e gbre ijr lele erm mij ebr feɔ ab. M'am eɔɔ feɔ m'eb Krist sosisem eci, anke eke mi b'anɔ fuefue a, yogɔ em anake mi b'ij lec a.

Pɔl am ebr Korent ec'ɔmn esel a ec'erm ij

¹¹Sica am ekan eke m'am kok nuɔ em ɔɔɔ owi a! ɔny anake ɔɔn ke m'am kok eben a. ɔny anake blel dadr em ec'ow amamn ek'anɔm em a, anke eke m'elm low kaka yeɔi, low kaka anm eke ɔny eci “**erm** esel egbel” a ɔny akm'm! ¹²ɔny ogɔ yogɔ ekan em ec'erm susu ligbel a, simeny ewr a, ów any iti owi a lele sakrowa ab ab. Ów amua feɔ am yegm eke m'el erm es wewe tasi. ¹³Bla obi Sinyamel ejec'a ɔny eke ɔny ɔnymn ee? Ee, nawre gbe, m'ɔɔm ɔny labm kaka! Kɔ na anake el low ɔɔɔ ab ee? Eben ke ɔc apr'm ɔ!

¹⁴Mi bebɔm ɔny ogɔ yogɔ e sakp nyahan em ec'ow e sos[†] etɔ mi k'ow m'ɔɔm ɔny labm kaka. Em, ow elm ɔny ec'os a m'ɔlm es, kɔ ɔny obi ɔny obi. Nawre em a, ow elm etuey am kokm os ɔɔm el esel, kɔ ey esel anake it eke ki kok os ɔɔ el ec'ey a. ¹⁵Em gbe, sos em b'ow iɔn'm eke mi kí ɔɔɔ

[†] 12.2 *Krist e jam us es nyam any*: Pɔl, in obi e low n'am dad. *afr kpekpe*: odad ebl na Grék em a afr nyahan em. Jwifel e nawre ub em a, ow el usu a eke Nyam ir ke wel b'esɔ Paradis a (Ékn akr 4 em a). Yogɔ ce anake agɔ a ek'el Nyam e lawlel a b'anɔ a. [†] 12.14 Ékn 2 Korent 13.1 em a lele ow ec'akr otar ab ab.

os ɔny eci, ke m'ɔc em obi e sel a nimum yeji m'igɔ af. Kɔ eke m'erur ɔny nɔnɔ nɛnɛ a sɔsiɛm anake ɔny k'ow erurmɔm' m nɔnɔ ab ee?

¹⁶Nawɛ eke m'ɔm ɔny labm kaka, gbɛkɔ agɔ bɛb dad eke yadɔ em am ɔny ɛtɔ em e kprakpr ab em, em ɛju ɔny. ¹⁷Kɔ eke b'ɛwr nyamɔn ɛkan agɔ a fɛɔ eke m'ɔɔ ow ɔny ec'araɔn a, ɛl em ec'ɛgɔ nyam anɔ eke m'ɛcr in em m'ij ɔny os ee? ¹⁸Mi dad toɔ Tit ɛgɔ eb eke k'ow ɛkn ɔny, ɛtɔ m'ɔɔ ɛgɔ lisijim nyam igɔ'n ab ow.[†] Kɔ Tit ij ɔny os ee? Kɔ in lel em ab, s'ɔnym tutr nyam coco ɛjagb nyam a eke s'ɔkɔ any ab em ee?

¹⁹Ow ibn ek'am tutar eke s'am dogɔn sos ɔny ec'any af. Njan! Nyam ec'any af s'am dogɔn sos ɛsɛ Krist e jam us ɛsel af. Erur em ec'agɔ lisijimɛl, s'am kok ɛbɛn eke si k'ɛlum ɔny abu agbr ɔmɔ em. ²⁰Lɛgɔ a eke mi b'ow m'ow ɔny ogɔ yogɔ a, ow am ɔny'm ɛrɔn eke mi k'ɛɔnm ɔny ɛsɛ elɛl eke m'am erur eke k'anɔn ab af. Ke oglog em yeji, k'ɛrurmɔn em eci elɛl eke mi b'ow mi kokr a. Erɔn am ɔny'm eke yogɔ mi k'uyum ɔw ɛsu, nyamɔnɛyr, ɛrm bebl, agɔ ec'ow ɔnyanin, agɔ wɛwr owi, agɔ cacak owi, mɛgɔnɛl lele suksuk owi ab. ²¹ɛmɛny low nyam ec'ɛrɔn yeji am ɔnym: em ec'ow ab em, oglog ke Nyam kɔk'm ɛs ɔny ec'any af. M'am uru eke mi k'ikɔ ɔnɔ ɔny em ec'agɔ nɔnɔ eke abu anɔ em am kok lɛgɔ sig em e sikpl a eci. Tasi em a, yɛfɛnyɔna yeji -li k'ɛwlm -li ki lerm Nyam. -N'am ir ɛb eke ɔm ɛl -l'aylmɔn, -n'am ij **nfaci** ɛtɔ -n'am ɛbirir marem marem.

Ów ɔm es abal el

13 ¹M'am bɛbm sos eke mi k'ow ɔny ogɔ yogɔ sakp nyahan em,[†] ɛtɔ ɛsɛ elɛl eke Nyam Lɛl dad ab af: *Gbuɔ ke wɛl jɛj odad fɛɔ ok a, ow it eke wɛl k'iri adanɔku yony oglog nyahan nɛnym.*^{† 2} Sica lɛgɔ sig em ec'agɔ a eke kok sikpl a lele agɔ ɛjɛc'ab ab anake m'am dad odad a. Yɛfɛnyɔna m'anm ɔny araɔn, gbɛkɔ ɛmɛny m'am ebr low a eke mi dad eke m'ow ɔny ogɔ yogɔ sakp yony em a m'ɛsɛ: lɛgɔ a eke mi b'ow m'ɛwl m'ow a, mi b'ow mi kok lɛc owi ɔny fɛɔ ab, ³anɔke am erurir eke k'ɛkan low ek'am yegm eke Krist b'ɛcr em em dad odad a. Eke li bi kok low n'ɔɔ ɔny a, l'ɛlm sos ɔnymu, kɔ nana, li b'ɛlu in ec'abusu ɔny a ɔkm ɔny ec'araɔn. ⁴Nawɛ, wɛl ɛw Krist oliɔn af, eke n'ɔnym sos a sɔsiɛm, gbɛkɔ n'anɔn owr Nyam ec'abusu ab em. ɛy yeji, in ab eke s'okr af a anake s'ɔnym sos a; gbɛkɔ si b'ow si yegm ɔny eke s'anɔn owr in ab Nyam ec'abusu ab em.

⁵Sica ibrmɔn ɔny sosi low eke am iir ɛb ɛsɛ ɔmɔn ɛsel af, igbal ɔny sosi ogɔ ɛkan. Kɔ k'ɛknmɔn eke Krist anɔ ɔny ab ee? Eke ow ɛcrm ɛbɛn, ke ɛs

[†] 12.18 Pɔl dad ɛgɔ lisijim na e low nuɔ 8 ec'akr 22 em a. [†] 13.1 Sakp nyahan em: krekre e Korent eke n'im a, yogɔ anake li sigm yogɔ e Nyamɛl ab es a (Ob Kok 18); yony em e Korent e n'im ke n'am dad ow ec'odad akr 2 em a, ɛl ubr eke l'ubr yogɔ segɔn abi ce, lɛgɔ ab em eke n'anɔn Efɛs a (Ob Kok 19). [†] 13.1 ɛkn Ol ɔkn 19.15; Matie 18.16; 1 Timote 5.19; Ebre 10.28.

ɔwal okr a. ⁶Gbekɔ ey ec'a, m'am ɔny ɔmn eke b'ow egɔn uwr any eke ey s'ɔwlm s'okm es. ⁷Ey s'am ɔny Nyam eke kí kokmn low ɔny kaka. Eɔny ow elm ke si yégm ɔny eke s'ɔny low ij. Njan, low mamn ce s'erur eke ki kokr. Eɔny ɔfr ɔfr eke low a am yégm eke s'ɔny lɔbr. ⁸Tasi em a, si k'ɔtum si kokm low kaka low nawre ec'any af, in e juma ce s'ɔtu eke si ki kok. ⁹Ee, sos em b'ɔny ey sakp sakp feɔny eke si b'anɔny sos ɔnym em ke ɔny b'ɔny lɛc a. Ow sosiem yec'eke s'am ibrm ey e ɔny em a el: ke emeny éwal ijr lɛc ɔmn em. ¹⁰Low na sosiem anake m'am awɔny ɔny lel eke m'anɔny kpekpe a. M'erurm eke mi k'elɔny lɛc ɔkm lɛgɔny eke mi b'ow m'anɔny ɔny ec'araɔny a. Tasi em a, Es Kɔtɔkɔ ɔny abusɔny eke mi k'elɔny Nyamel a abu agb ɔmn em, kɔ ow elm in e ɔny eci.

¹¹Sica agɔny lisijimel, àny sos em ɔny em. ɔny ɔmn em e lɛc eke k'ɔny es, àtarir sos es ke neny ókr ɔny af ɔny ɔfr em. Ìr eb erm es ey em, eɔny erur lele erm es ey ab e Nyam a b'ow anɔny ɔny ab.

¹²Èsɔninin ɔny ɔfr, ke éyarir af ese Krist em ec'agɔny lisijimel lele agɔny lisijowel ab af. Agɔny lala a feɔny am esɔny ɔny.

¹³Ke ey Es Kɔtɔkɔ Jesu Krist ec'ɔwɔny, Nyam ec'erur lel Abɔny Lala ec'af okr a àny ɔny feɔny ab.